

AKASHVANI AIZAWL

REGIONAL NEWS BULLETIN

HEADLINES (EVENING)

- 1. Kawnpui leh Sairang inkar kawng chu karlehah ngawrh lehzuala siam a ni dawn a, kawng siam hna hi khaw 5 YMA ten hnatlangin an thawhpui ang.
- 2. Sorkar laipui-a sum dil nan Mizoram state capital Thenzawla sawn turin Chief Minister in central sorkar ah ngenna a thlen tia MNF Party puhna chungchangah thil awmzia an hriat loh thu political party hrang hrang ten an sawi.
- 3. PM-KISAN Scheme Kaltlangin Mizorama Kuthnathawktute mi nuai 1 sing 3 & 1,238 te hnenah cheng vbc 38 nuai 6 sing 8 sang 6 semchhuah a ni.
- 4. Prime Minister Narendra Modia chuan Operation Sindoor neih chhung khan khawvelin India amaha thil a tihtheihzia an hmu tih a sawi.



HOME MINISTER INSPECTS KAWNPUI-SAIRANG ROAD MAINTENANCE

Kawnpui leh Sairang inkar kawng chu karlehah ngawrh lehzuala siam a ni dawn a, kawng siam hna hi Kawnpui, Khamrang, Mualkhang leh Sairang YMA ten hnatlangin an thawhpui anga, sorkarin lawmman a pe ang.

He ruahmanna hi vawiina helai kawng tlawhtu Home Minister Pu K. Sapdanga hova siam a ni a, ruahmanna an siam dan chuan karleh ni 4-9 chhungin ngawrh lehzuala kawng siam hna hi thawh tum a ni a, he ni 5 chhung hian PWD leh NHIDCL ten an tha zawng zawng hmangin kawng siam hna an thawk ang a. Lirthei tangkhang mekte chu Mizoram Police ruahmanna hnuaiah naktukah chhuahtir vek tur niin, ke 14 nei chin chunglam erawh chu tlan phal a ni rih lo ang a, an bungraw phurh pawimawh leh hmanhmawhthlak chu truck te zawka hlang chhawng tur a hrilh an ni.

Thawhtanni atanga Nilaini inkarah chuan lirthei eng chi mah tlan phal a ni dawn lo a. Hetih chhung hian 407 chin hnuailam tan tlang kawngah, Kawnpui-Serkhan-Durtlang road-ah tlan theih a ni ang a. Lirthei chet vel dan hi Aizawl leh Kolasib Traffic Police ten an vil dawn a ni.

MLA Pu TBC Lalvenchhunga chu Single Point of Contact niin kawng siam hna hi a vil zui dawn bawk a ni.

Puan tawh angin, Lirtheia Eizawng Pawl hrang hrang 22 inzawmkhawm chuan Mizoram chak lakluhna kawngpui pawimawh a rang thei ang bera siamthat anih theih nan karleh ni 4 atanga ni 9 inkar chhung 'Lirthei Tlan Chawlh' an puan dawn thu an lo sawi tawh a.

Lirtheia Eizawng Pawl hrang hrang Chief Convener Pu Robert Lalrinawma chuan Sairang atanga Vairengte (NH 306/06) inkar Khamrang kawngah lirthei tangkhang a tam avang leh kawng siamtuten hnathawh a ti buai ni-a an sawi bawh avangin 'Tlan Chawlh' puan an rel ta tih a sawi a ni. Hemi hun chhung hian sorkar chu hma la turin an phut tih an sawi a, ni 4 thleng heng kawngpui lirthei tangkhang zawng zawngte chu lo inthiarfihlim tur leh heng lirthei te hi lo chhuah turin an ngen tih a sawi a, kawngsiam chhungin hnathawktuten thawl taka hna an thawh theihna tur leh kawng tha taka an siam theihna turin lirthei tlan lo turin an ngen tih an sawi a ni.

<><><>

PARTIES VIEW ON SHIFTING OF CAPITAL

Sorkar laipui-a sum dil nan Mizoram state capital Thenzawla sawn turin Chief Minister in central sorkar ah ngenna a thlen tia MNF Party puhna chungchangah sorkar thil kalpui dan ni a sawi chu an hriatthiam loh thu political party hrang hrang ten an sawi.

MNF General Secretary Pu Zodinpuia chuan nimina an party inkhawmah thusawiin Mizoram leh Aizawl mipui rawn lovin Mizoram state capital Aizawl a ruk a sawn tumna lo awm reng a ti a, Chief Minister hian Aizawl khawpui tawt lutuk tihziaawmna tura ‘peace city’ din tum a nih thu bak mipui hmaah a puangzar lo a ti.

Pu Zodinpuia chuan sawrkarin peace city project a buaipuina ah thuzep ruk lian tak a nei a ti a, sawrkar lehkhah an hmuh theih hrang hrangah Mizoram state capital Aizawl sawnna tur thu a chuang tih a sawi a ni.

Byte of Zodinpuia....

Hemi chungchang hi political party hrang hrang ten mak an tih thu leh thli tihawma an ngaih loh thu Akashvani zawhna chhangin an sawi a. BJP Mizoram State President Dr. K. Beichhua chuan party aiawha engmah ngaihdan an la siam loh thu sawiin hetihruah ama ngaihdanah chuan state khawpui sawn chu thil liantham tak, political party te pawh inrawnkhawm ngai thil a nih thu a sawi.

Byte of Dr. K. Beichhua.....

Mizoram Pradesh Congress Committee President Pu Lal Thanzara chuan Chief Minister in khawpui Thenzawl lama sawn a tum niawma lehkhah kal vel an lo hriat chu an party in mak an tih thu leh mipuite leh ama thawhpui ngei ngei te pawh a rawn lo emaw tih tur a ni a ti a, an party chuan awm pawh an tih loh thu a sawi.

Byte of Lal Thanzara

Mizoram Aam Aadmi Party President Pu Andrew Lalremkima Pachuau chuan sorkar chu mipui sorkar a nih angin mipuiyah an hriattir phawt tura an ngaih thu a sawi a. State khawpui sawn chu duh duha tih ngawt theih a ni lo tih sawiin mipuite ngaihdan azira thil a kal tura an ngaih thu a sawi a ni.

Byte of Andrew Lalremkima Pachuau

PC Party President Pu Vanlalruata chuan an President hmasa, CM hlui Brig. Thenphunga Sailo hoin tlak lama khawpui zauh tumna chu an rilrua lian ber a nih thu a sawi a. Tuna thu leng mek chu Cabinet-ah pass loin, legislature-ah pawhin a pass loh thu leh thil liantham chutiang lam hawi chu hriat a la awm lo chu mak a tih thu a sawi a ni.

<><><>

ASF

Vawk pul hri, African Swine Fever (ASF) chuan Mizoram district pasarihah bu khuar tawhin heng district-a khaw 115-ah te a leng mek.

AH & Vety department hotute hnen atanga Akashvani thudawn danin ASF hi Mizoram chhunga district pasarih Mamit, Lawngtlai, Siaha, Lunglei, Khawzawl, Champhai leh Hnahthialah te a leng mek a. Heng district-a khaw 115 ah hri hi a leng mek a ni. AH & Vety Department hotute chuan Akashvani zawhna chhangin ASF avanga vawk thi leh suat chu a awm ve reng thu sawiin pung hluai chuang loin a khat tawkin a awm ve reng tih an sawi a. Nimin khan ASF avangin vawk 74 a thih thu leh vawk 18 suat a nih thu an sawi a. Hetihian kumina ASF avanga vawk thi chu 7027 a nih thu leh ASF avanga an suat tawh zat chu 2709 a nih thu an sawi a ni.

Vawk pul hri ASF hian tun dinhmunah Siaha district a tibuai nasa berin khaw 38-ah ASF hi a leng a. Lunglei district-ah khaw 30, Lawngtlai district-ah khaw 18, Khawzawl district-ah khaw 12, Hnahthial district-ah khaw 8, Champhai district-ah khawl 5 leh Mamit districtah khaw 4-ah te a leng mek a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.

<><><>

PM-KISAN

PM-KISAN Scheme Kaltlangin Mizorama Kuthnathawktute mi nuai 1 sing 3 & 1,238 te hnenah cheng vbc 38 nuai 6 sing 8 sang 6 semchhuah a ni.

Vawiin khan Prime Minister Pu Narendra Modi chuan India rama kuthnathawktute tuamhlawmna Scheme pui ber, PM-KISAN Samman Nidhi hnuai tanpuina 20th Installment chu Varanasi, Uttar Pradesh atangin Direct Benefit Transfer kaltlangin a sem chhuak a. India rama kuthnathawktu vaibelchhe 9 leh nuai 70 te hnenah avaiin Cheng Vaibelchhe 20,500 sem chhuah a ni a. Heng zingah hian Mizorama kuthnathawktu te pawh hi an tel ve a ni.

He hun hi Mizorama District hrang hranga District Agriculture Office leh Krishi Vigyan Kendra atangte in live telecast kaltlanga chhim a ni a. State Level

programme chu KVK Aizawl, Selesih-ah hman niin he hun hi Environment, Forest & Climate Change Minister Pu Lalthansanga chuan a hmanpui a. Minister chuan Mizorama kuthnathawktu tam takin PM-KISAN kaltlanga sawrkar laipui tanpuina an dawng thin chu lawmawm a tih thu sawiin, scheme-in a tum leh a beisei ang ngeia tangkai taka hmang turin hamthatna dawngtute a chah a. State sawrkar flagship programme Hand Holding Scheme Phase-2 hnuaiah kut hnathawktute tan Online application dil theih a nih thu a tarlang bawk a ni.

<><><>

PM

Prime Minister Narendra Modia chuan Operation Sindoor neih chhung khan khawvelin India amaha thil a tihtheihzia an hmu tih a sawi. Vawiina Varanasi-a PM KISAN Samman Nidhi a hawnnaah he thu hi sawiin Pu Modia chuan Operation Sindoor hmangin Pahalgam firfiaka chetna tuartute tan rorelna dik thlen a ni a ti a. Loneitute chungchang sawi bawkin PM Kissan Samman Nidhi chu sawrkarin loneitute hamthatna thlen tura theihtawp a chhuah zia tilangtu a ni a ti.

<><><>